

Dithero tsa Tirelano mo Kutlwanong

31/2014 Ka moletlo wa go gopola tlhatlogo ya Morena, e le ka 06. 09. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 143 - 126/130

2. Thapelo: Modimo, Mong-wa-thata yotlhe, ka Morwao yo o tsetsweng a le esi, Morena wa rona Jesu Keresete a tlhatlogetse kwa legodimong, le rona re baakanyeditswe gore re letlelelwe go tlhatlogela teng ka pelo le ka maikutlo a rona gore re nnele ruri le ene yo o tshelang a busa le wena le Mowa o o Boitshepo, jaanong le ka bosakhutleng. Amen.

3. Epistolo ka fa thulaganyong ya 2 e kwadilwe mo go Ditiro tsa baapostolo 1:1-11;

Efangele ka fa thulaganyong ya 1 e kwadilwe mo go Luka 24:44-53.

4. A go ipolelwe tumelo ya bokeresete!

5. Sefela sa 141 - 124/127

6. Thapelo ya mmadi wa thero.

7. Epistola ka fa thulaganyong ya 6 e kwadilwe mo go Baefeso 1:20-23, e re: "Modimo o dirile ka nonofo ya ona mo go Keresete ka go mo tsosa mo baswing le ka go mo nnisa fa letsogong le le jang la ona mo legodimong, godimodimo ga puso yotlhe le taolo le thata le borena le leina lengwe le lengwe le le ka bidiwang, e seng fela mo lefatsheng leno, mme le gona mo go le le tlang. O beile tsotlhe fa tlase ga dinao tsa gagwe, wa naya phuthago ene a le tlhogo e e godimo ga dilo tsotlhe. Phuthago ke mmele wa gagwe e a tletseng mo go yona, a tlatse tsotlhe mo go botlhe." Amen

8. Thero: Barategi mo Moreneng, gompiano mo moletlong wa go gopola tlhatlogo ya Morena wa rona Jesu Keresete, e le ka letsatsi la bomasome a le mane morago ga moletlo wa go gopola tsogo ya gagwe rona ba re leng mo kopanong ya mmele wa gagwe ka go kolobediwa mo leineng la gagwe le ka go dumela mo go ene re gopola go galalediwa ga Morena, jaaka re utlwa gore "Modimo o dirile ka nonofo ya ona mo go

Keresete ka go mo tsosa mo baswing le ka go mo nnisa fa letsogong le le jang la ona mo legodimong.” Keresete o teng fa gare ga rona le mo nakong eno, jaaka a le teng mo go rona ka Lefoko le ka disakaramente le ka ditsholofetso tsa gagwe. Ke ene, ke ene fela yo o ntseng ka fa le le jang la ga Rraagwe mo legodimong. Seo se rayang? Lefoko la thero ya kajeno le re senolela tse pedi, e bong

1. Jesu Keresete ke Morena mo godimo ga botsotlhe;
2. Jesu Keresete ke Tlhogo ya kereke ya gagwe.

1. Jesu Keresete ke Morena mo godimo ga tsotlhe, o mo godimo ga botsotlhe, mmogo le legodimo, le e leng loapi. Rara, yo e leng Rara wa rona rotlhe yo o mo legodimong o mo felong ga lereo leo le e leng legodimo le le godimo ga magodimo otlhe, e bong felo ga Modimo fa go baakanyeditsweng teng manno a botshelo jo bo sa khutleng. Modimo Rara yo o mo legodimong leo wa tsosa Jesu Keresete mo baswing, wa mo nnisa “godimodimo ga puso yotlhe le taolo le thata le borena le leina lengwe le lengwe le le ka bidiwang, e seng fela mo lefatsheng leno, mme le gona mo go le le tlang. O beile tsotlhe fa tlase ga dinao tsa gagwe.” Ke boammaaruri jo bo sa re tsoseng pelaelo e e ka tlhagang mo tthatlogong ya Morena. Ke tshwanelo gore tseo di tlhaloganngwe, fa di dirafaditswe ke Modimo, Mong-wa-thata-yotlhe. Jesu o ne a sa leke go itseela kgalalelo eo ka boene. O e abetswe ke Rraagwe. Jesu o ne a sa leke go ikgalaletsa, le e seng go ikgodisa, o ne kopa go galediwa ke Rraagwe, a Abelwa kgalalelo ke ene. Rraagwe o beile tsotlhe ka fa tlase ga dinao tsa gagwe. Ke gore: Modimo o tswaledisa tsotlhe, o dira tsotlhe mo lefatsheng ka Jesu Keresete fela. Ke gona re ipolelang re re: Le fa go itsiwe ke batho, le fa go sa itsiwe ke batho, tsotlhe tse di mo lefatsheng di amana le Keresete Jesu. Sebopiwa sengwe le sengwe se se ka nnang mo lefatsheng ga se ka ke sa hema kwa ntle ga Keresete, ga se kgone go ja, gongwe go nwa kwa ntle ga Keresete, jaaka go kwadilwe gore “tsotlhe di tlhodilwe ka ene, e bile di tloletswe ene, Bakol. 1:16. Botlhe ba ba dumelang mo go Jesu ba ikaega mo go Jesu Keresete, le ba bangwe ba tshwanetse go ikaega mo go ene. Le fa ba sa ikaege mo go ene, ba tshwanetse go utlwa gore le botshelo jwa bone bo agilwe mo go ene. Fa ba sa ikaege mo go ene, botshelo jwa bona ga se botshelo jo bo tshelang tota, mme ke botshelo jo bo isang mo losong lo lo sa khutleng, jaaka botshelo jwa ba ba ikaegang ka tumelo mo go Keresete, e le botshelo jo bo sa khutleng, le fa ba ka swa, ba a tshela ka fa tsholofetsong ya ga Keresete, Joh. 11:26. Ke nnete, fa Modimo o

tsweledisa tsotlhe mo lefatsheng le mo legodimong ka Keresete, kwa ntle ga gagwe ga o dire sepe.

Keresete o a athola tse di dirwang mo lefatsheng. Tsotlhe tse di tsweledisiwang mo lefatsheng di tsweledisiwa ke ene, e seng ke yo mongwe. Le ba mebuso, gongwe ba goromente ga ba ka ke ba dira fela se ba se ratang, le fa go ka lebega, fa tsotlhe di diragala mo lefatsheng ka fa thatong ya bona. Dithata tsotlhe, le tsa yo o bosula di ka fa tlase ga Keresete. Le tsona ga di na thata go dira tse di di ratang. Le tsone ga se tse di busang. Satane e ne e le moengele, mme a tsogela Modimo, ga se yo o nang le thata tota-tota mo diatleng tsa gagwe. Ga se mmusi wa lefatshe, le e seng wa botsotlhe. Yo e leng Mmusi wa botsotlhe, yo o tshwereng tsotlhe mo diatleng tsa gagwe ke Keresete. Ke fa re tshwanetse go gopola, fa go buiwa fa ka ga Jesu yo o kileng a bapolelwa mo sefapaanong gore a swele batho botlhe ba merafe yotlhe ba dipaka tsotlhe. Ke kitso eo e e dirang gore re gakgamale ka go gopola gore yo o neng a nyadiwa mo go maswe mo ga kalo ke ene yo o godisitsweng mo go kalo ka tthatlogo ya gagwe. Modimo Rara a tsaya Kwana e e neng ya bapolelwa mo sefapaanong go tlosa maleo a lefatshe go mmaya mo godimo ga tsotlhe, le mo godimo ga botlhe. Phuthego e e rategang, ke ene yo e leng monna wa rona yo o ntseng mo setulong sa bogosi jwa lefatshe lotlhe, le jwa magodimo otlhe. Ene o itse le wena, o itse leina la gago, le wena o a mo itse.

A go na le a le mongwe fela fa gare ga baporesidente ba mafatshe a a borobedi ale a a neng a kopana go baakanya tsa madi mo lefatsheng, yo o itseng leina la gago? A moporesidente wa lefatshe la rona o itse leina la gago? A ene o itse matshwenyego a gago, le ditlalelo tsa gago, le matsapa a gago, ke re le ditherego tsa gago mo segakoloding ka ntlha ya maleo a gago? Ga ke dumele, fa a di itse. Ga a itse sepe ka ga tse tsotlhe tseo tse e leng tsa gago. Ga go diragale gore a itse maina a batho botlhe ba lefatshe la gagwe. Gape ga re lebelele gore ene a di itse. Go ka bo go se tshwanelo go lebelela gore mookamedi wa lefatshe a itse tseo. Le fa go ntse jalo re na le yo o ntseng mo setulong se se godimo ga baokamedi botlhe ba lefatshe yo o re itseng rotlhe, yo o itseng wena, yo o itseng le tse o di akanyang mo motswetsweng ono. Ene o itse tse o tla di buang, pele o ise o di bue. Mo setulong sa Modimo mo legodimong o ntse Jesu Keresete yo e leng motho ruri, e le mogolo wa rona, le Morena wa rona, ga a re tlogele. Ke motho ruri, le Modimo ruri. Re baakanyeditswe ke ene go kgona go bua le ene, le fa

e le ka nako efe. O rata thata gore re bue le ene gantsi, re se khutle go bua le ene. Le fa go ntse jalo re a botsa re re: Go diragala jang, fa re bona dingwenyana fela tse di dirwang ke ene mo lefatsheng? Karabo e re: Ga di bonwe ka matlho, gonne tse e leng tse dikgolo tota o a di dira ka Lefoko le ka disakaramente tsa gagwe. Boammaaruri joo bo a re goga gore re amogele thuto ya bobedi ya tse di bonalang mo lefokong la thero ya kajeno, e re:

2. Jesu Keresete ke Tlhogo ya kereke ya gagwe. Jesu ke yo o okamelang dithata tsotlhe le babusi botlhe ba lefatshe, e bile ke Tlhogo ya kereke. Jesu Keresete o mo lefatsheng, o dira mo go lona, mme mo kerekeng o teng ka tsela e nngwe. Kereke ke mmele wa ga Keresete. Tlhogo ya mmele oo ke ene Jesu Keresete. Ka mafoko ao ga go buiwe setshwantsho fela, gonne kwa ntle ga Tlhogo e mmele o e leng kereke ya gagwe o ka bo o se na botshelo, o ka bo o sule. Kitso yotlhe le botlhale jotlhe tse di leng teng mo kerekeng di tswa mo Tlhogong ya yona. Bogolo go moo go itsiwe gore botshelo jotlhe le dikakanyo tsotlhe tsa nnete tse di leng teng mo kerekeng di tswa mo go ene, di tsweledisiwa ke ene yo e leng Tlhogo ya yona.

Dithata tse di bosula le maikaelelo a a ganetsanyang le thato ya gagwe, le fa di bonala gongwe di utlwagala mo kerekeng, ga se tsa mmele wa ga Keresete. Kereke e e leng mmele wa ga Keresete ke yona e e leng Kereke ya nnete e e boitshepo. Fa go buiwa ka ga Kereke e e boitshepo ya bokeresete go rewa kereke e e leng e lengwe fela ya dipaka tsotlhe, e e leng mmele wa ga Keresete. Ke gore mo mmeleng wa gagwe Keresete o teng ka bolenteng jwa gagwe jo bo sa tshwaneng le bolengteng jwa gagwe mo lefatsheng gongwe go gongwe.

Mo mmeleng wa gagwe o e leng kereke Keresete o teng ka botlalo jotlhe jwa gagwe. Mo mmeleng wa gagwe o tla fitlhela botlalo jwa gagwe jo bo tlatsang lefatshe lotlhe le legodimo. Botlalo jwa ga Keresete bo rayang? Ke dineo tsotlhe tsa gagwe, le thata yotlhe ya gagwe. Tse tsotlhe tseo di teng mo mmeleng wa gagwe. Ke ditshegofatso tsotlhe tse di umakiwang mo go Baefeso 1:1-19: e bong bopelotlhomogi jwa Modimo jwa go nna le kgololo ka madi a ga Jesu, boitshwarelo jwa ditlolo tsotlhe tsa rona, le neo ya botlhale, le go tlhaloganya bosaitsiweng jwa thato ya Modimo e e kopanyang tsa legodimo le tsa lefatshe mo go Jesu Keresete. Mo mmeleng wa gagwe tumelo e abelwa mo go ba ba utlwang Lefoko la gagwe, le mo go ba ba e kanelwa ka tsholofetso ya

Mowa o o Boitshepo mo kolobetsong. Mo mmeleng wa ga Keresete go a rapelwa, badumedi ba a rapelelana, ba a rapelela, ba kopela le ba ba kwa ntle ga kereke gore le bone ba abelwe pholoso e e mo go Keresete Jesu. Ditshenolo di diragala ka Lefoko la ga Keresete Jesu gore ditokololo tsa mmele wa ga Keresete di itse khumo ya boswa jwa tsona, le dithata tse di sa lekanngweng le sepe tse di tiholang tumelo mo dipelong tse di tshwanang le matlapa ka go di fetola go nna dipelo tsa nama.

Mo tumelong go tla tlhaga leungo la lorato gore ditokololo tsa mmele wa ga Keresete di ratane, di rate baitshepi, le baba ba kereke. Ka jalo go tlhaga mo Tlhogong ka go kgabaganya mmele wa yona gore lorato lo phenologe mmogo le kagiso ya ga Keresete, lo tsene mo ditokololong tsotlhe. Mmele o wa ga Keresete ga o swe. Ga go na ope yo o ka bong a na le thata mo godimo ga ona, ga go na yo o ka bong a ka busa mmele o. Mmusi wa ona ke Keresete fela. Kereke ya ga Keresete e e boitshepo ga e nke e khutla, e nnela ruri. Jesu o emela kereke ya gagwe ka nosi.

Bokhutlo: Ga go tlhokege gore re boife sengwe, gongwe mongwe, bogolo le fa re diragalelwa se se bosula thata. Jesu o ntse mo go le le jang la ga Rara. O gongwe le gongwe. Ga go na sepe se se ka diragalang mo lefatsheng se se sa itsiweng ke Jesu. Go nna mo go ene ke go nna ka fa tlase ga thata ya gagwe, le ka fa tlase ga puso ya gagwe. Ga go na sepe se se ka nnang le thata go re kgaoganya le lorato lwa gagwe. Ke motho fela ka boene yo o kgonang go ikgaoganya le ene, ka go gana go amogela lorato lwa gagwe. Ka go gana go dumela mo go Jesu motho o ka intsha mo mmeleng wa gagwe, le mo ditshegofatsong tsotlhe tsa gagwe. Go ka diragala bosilo jo bogolo jo. Boammaaruri jwa gore Jesu o tthatlogetse kwa legodimong go nna mo go le le jang le ga Rara bo na le thata mo godimo ga tsotlhe tsa batho botlhe. Thuso ya tthatlogo ya gagwe e amogelwa ka go dumela mo Lefokong le le re senolelang boammaaruri joo. Beibele ke Lokwalo lo lo rutiwang bantsi jwa batho mo lefatsheng le kajeno. Kwa Aferika le kwa Asia boitshwarelo le kagiso ya ga Keresete di goga batho ba le bantsi ka go golola batho ba le bantsi mo pusong ya lefifi. Jesu o dira tiro eo. Go ka nna tshegofatso e e ntseng jang, fa motho a sa kopane le mmele wa ga Keresete? Mo bofelong go tla tatlhego fela mo go yo o ntseng jalo. Le fa go ntse jalo, Keresete ga a fenngwe. O sa ntse a le teng mmogo le ditshegofatso tsa gagwe. Amen.

9. Thapelo: Morena Modimo Rara, re leboga, ka o re sedimoseditse dipelo tsa rona, wa re senolela sešwa go itse tse re di baakanyeditsweng ka go tthatlogela ga Morwao mo legodimong, le ka go nna ga gagwe ka fa le le jang la gago gore e nne Mmusi wa babusi womhlaba wonke, le ka go nna Tlhogo ya mmele wa gagwe o e leng kereke e e gotlhe ya gagwe. Re a go tumisa, re lebogela tsholofetso ya gagwe ya go nna le rona le kereke ya gago. Morena, o nnele ruri le rona. Amen. Thapelo ya Morena: Rara wa rona yo o mo legodimong ...

10. Sefela sa 146 - 129/ -

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen. Thero eno e kwadilwe ke K. H. Schnackenberg ka ngwaga wa 2014

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.